

梧
溪
集
附補遺

一



梧
溪
集
附補遺

二



梧
溪
集
附補遺

三



此據知不足齋
叢書本排印初編各
叢書僅有此本

士莫先於尚志。志之所在，言行著焉。考其行，諦其言，可以知其志矣。世微道息，既不可潔身以亂倫，又不可忘世而獨善，飭躬脩辭，中慮中倫，高尚之志，隱然可見。斯得不謂之君子已乎？吾讀梧溪集而得其人焉。曰江陰王逢，原吉父。原吉氣清而才茂，學治而行檢，優談論，富謀畫，弱冠獲譽士林，嘗稱疾牢辭臺臣之薦，人咸高之。遭時多虞，以客爲家，大府交辟，一不就。迴翔州里，能以一言活黨亂者數千人之命。以一檄降惡少五千之衆，又聚瘞無錫之殲於兵者千百人之齒，力可致者，不少怪齎，與之語，恂恂也。至於去就之辨，三公不能易其介，三軍不能奪其節，故其吐而爲歌詩也，一則闡彝倫之大，一則櫟幽潛之光，一物一事之詠，未嘗不重致其憂思慨歎焉。其辭婉而諷，其旨微而貞，蓋有得夫六義之蘊，植於事爲者，如彼發於詞章者又如此。所謂中慮中倫者，非與？於乎！行藏顯晦，士之大致也。有義存焉，以原吉之才之學，無施不可，又非無相知者，其不願仕者，志也。志豈異於人哉？惟其義而已。吾誦其詩，不惟嘉其志，而又有感焉。白駒考槃，不圖見於斯時也。原吉中年築草堂於松之青龍江上，以吟詠自娛，追惟其大母徐夫人，嘗手植雙梧於故里橫河之上。今世遠地殊，因自號梧溪子，示不忘也。故集以是名。其殆自混於天隨元真之流乎？雖然，其視枉己而含義者，奚啻天壤異時如傳逸民，吾必以原吉爲魯仲連之列。至正己亥仲秋，番陽周伯琦書。

世稱老杜爲詩史。以其所著備見時事。予謂老杜非直紀事史也。有春秋之法焉。其旨直而婉。其詞隱而見。如東靈湫、陳陶、花門、杜鵑、東狩、石壕、花卿、前後出塞等作是也。故知杜詩者。春秋之詩也。豈徒史也哉。雖然。老杜豈有志於春秋者。詩亡然後春秋作。聖人值其時。有不容已者。杜亦然。梧溪集者。江陰王逢氏遭喪亂之所作也。予讀其詩。悼家難。憫國難。採撫貞操。訪求死節。網羅俗謠。與民謳。如帖木侯、張武略、張孝子、費夫人、趙氏女、丙申紀事、月之初生、天門行、竹笠黃、官柳場、無家燕、諸篇皆爲他日國史起本。亦杜史之流歟。逢本山澤之士。其淡泊閑靜是其本狀。而有春秋屬比之教。故予亦云春秋之詩也。採詩之官苟未廢也。則梧溪之春秋得以私自託也。不然。何其屬比於冊者班班乎。其無諱若是也。訂其格裁。則有風流俊采。豪邁跌宕。不讓貴介威武之夫者。兼人之長。亦頗似杜。吁。代之勳故殘餘。欲傳於世。稱爲作人而逢詩不傳。吾不信也。至正十九年冬十一月初吉。會稽楊維禎書。

太平王生光大以激江權歌詩求予序其端。且曰：是詩江陰王原吉作也。原吉與子同姓同業，學詩於延陵陳漢卿。陳與柯敬仲俱事邵庵虞公，得其傳。邵庵蔚然儒宗，爲時名臣。柯參書奎章閣，卒。陳今爲東流尹，亦躋顯仕。原吉窮而在下，能自以詩鳴。家居激江，志樂漁隱，因以目其詩。初，光大得之永嘉陳昌道氏，併日夜讀一再過，竊中於心。光大事先生久，與原吉姓同業同，而其志又同，願受一言以爲許。噫！詩言志，無閒於古今，無分於隱顯也。當堯舜時，朝廷有虞歌之美，康衢有擊壤之謠。古詩三百篇，國風雅頌皆然。漢魏而下，舍其心志，工其文辭，迄於宋季，滋甚。我朝疎齋子昂能五言，曼碩善歌行，邵庵長於律。三四公繼作，一洒宋季之陋，並驅晉唐，駸駸乎漢魏，而逮於古矣。雖然，學古有道，生歸持其志，養其氣，使德存於心，而言出諸口，志之大者，其氣淳以清，其辭婉而直，其聲舒遲而旨意無窮，誠如是，不期古而古，何待有爲哉！且予聞文章與風俗相推移，觀激江權歌，則盧趙虞揭三四公之力昭昭矣。原吉守漢卿之學，宗邵庵之傳，博以三百篇之趣，權歌春申山水閒，發情止義，不古也哉！惜予老不能振之也。然聽歌滄浪，觀風康衢，必有審音者。原吉其不鳴天朝而虞歌於上矣乎？於乎！有所譽者，有所試也。倚歌而和之，樂善有誠也。聽其言而知其德，觀其志而審其有爲，古之人皆云：曾謂我媚夫人乎哉！王生其懋之，生請書其言，遂爲序。至正丙戌夏，新安汪澤民書。

欽定四庫全書提要

梧溪集七卷

元王逢撰。逢字原吉，自稱席帽山人，江陰人。當至正間，被薦不就，避地吳淞江，築室上海之烏涇。適張氏據吳，東南之士咸爲之用。逢獨高蹈遠引，及洪武初，徵召甚迫，又以老疾辭。明史文苑傳附載於戴良傳中，以二人皆義不負元者也。逢少學詩於陳漢卿，得虞集之傳，才氣宏敞而不失謹嚴。集中載宋元之際忠孝節義之事甚備，每作小序以標其崖略，足補史傳所未及。蓋其微意所寓也。是書傳本差稀，王士禎屬其鄉人楊名時訪得明末江陰老儒周榮起手錄本，乃盛傳於世。榮起號硯農，究心六書，毛晉汲古閣刊板多其所校，蓋亦好古之士云。

臣葉廷甲恭錄

重刊梧溪詩集序

元王逢原吉。梧溪詩集七卷。前六卷。原吉未歿已梓行。末一卷。其子掖所刊。皆在洪武時。迨正統間。板有缺壞。南康守陳敏政修補。見於景泰七年敏政後序。又下至明季。則傳者絕少。觀錢曾敏求記云。於劍映齋藏書中。購得前二卷。是洪武年間刊本。如獲拱璧。恨無從補錄其全。越十餘年。復於梁谿顧修遠家。借得後五卷鈔本。亟命侍史。繕寫成完書。可以知其罕遘矣。長塘鮑綠飲丈。雅意收入。知不足齋叢書。俾廣流布。乾隆末。欲見屬勘訂。適汲古閣所藏景泰刻本。歸予從兄之小讀書堆。爰敬諾之。彼此卒卒。近逾廿載。未及施功。而鮑丈作道山遊矣。嘉慶丙子。令子志祖。以遺言復謀於予。冬杪。持鈔本來。予不敢不力。借刻本細校一過。鈔者蔣西圃氏。名繼軾。在雍正丙午。亦出景泰板。然遇有模糊斷爛。皆脫去。或譌謬。爲之一一補正。不啻數萬餘字。乃始釐然可讀。唯第七卷板心舛錯。失去第四葉。參驗遵王家鈔本。亦未嘗有。蓋非獲洪武印本。末由補全也。校畢還之。又閱七年。方告刊成。兼屬覆校。予既嘆鮑丈拳拳閨幽。靡閒生死。又嘉志祖之克成先志。且感此書久晦於世。昔人搜訪維艱。今此辛勤僅就。詳書以爲之序。幸將來覽者。毋因後此易得。而轉致忽視善本云爾。其原吉與詩世固多知之。不待綴。道光三年歲在癸未三月。旣望元和。顧千里書於楓江儺舍。

梧溪集卷第一

江陰王逢原吉

孔子琴操四首

去魯作

汶泗交流兮，龜蒙相繆兮。鬱乎尼丘兮，禮樂賜自周兮。大夫好脩兮，吾將返吾輶兮。

過匡作

文王徂兮，道在予兮。天蓋常時則濫兮，二三子毋徐徐兮。伊草露之濡兮，

去衛作

我行于衛，有淇湯湯。彼或知本，伊流則長。載儻載偁，禾黍芒芒。匪邠鄆予傷，武公其亡。

厄陳作

天地塞兮，日月食兮。君子厄兮，周公云遠。心不知所底極兮，

顏子琴操一首，居陋巷作。

陋居我居，孰隘孰兮。薄田我田，孰嗇收兮。我順我安，親同休兮。仲尼聖也，道孰侔兮。孰愈予身，從其遊兮。

吳季子琴操一首，聘魯作。

白日晚兮浮雲滋。馬吾秣兮車吾脂。望岐周兮不見。念秦伯兮在茲。惟山有龜兮。惟水有沂。禮樂在魯兮。高深如斯。聖不我棄兮。吳其庶幾。

衛女琴操一首 思歸作有序

琴操曰。衛有賢女。邵王聞其賢。請聘之。未至而王薨。太子曰。吾聞齊桓公得衛姬而霸。今衛女賢。欲留之。大夫曰。不可。若賢女。必不我聽。若聽。必不賢。不可取也。太子遂留之。果不聽。拘於深宮。思歸不得。援

琴作歌曲。終縊而死。古有弦無歌。今弦亦絕矣。因補一章。
恭承母命兮。奉先王。咳。姓後宮兮。備酒漿。中路王薨兮。妾或未亡。遂太子之過兮。何有三綱。淇水沄沄兮。宛乎女桑。目冷弦絕兮。義也難忘。

席帽山辭

席帽山兮。岿亭山之人兮。朝鋤暮經。日月往來兮。雲下上。俯萬物兮。塵冥冥。塵冥冥兮。江介黑。彼山人兮。衣苧白。帶社衛兮。咀松柏。心周流兮。影斯息。出無節兮。入無時。猿鳥胥樂兮。樵牧我知。學荀脩兮。行著。稿死巖壑兮。予焉悲。

寄所思二首

七澤連三湘。衆水相沿洄。青青蒹葭草。綠生洲渚隈。蒼梧下白日。佳人獨徘徊。容光與香豔。幸好未衰穠。采采盈襜裳。寄子楚王臺。願表貞素節。路紆難自來。

處女難自媒。才士難自薦。自薦時尙可。自媒令人賤。猗儺牽牛花。弱蔓緣兼葭。光風拂衢路。蘭自老幽遐。豈無上尊酒。醺醺傾紫霞。公庭大酺暇。儻寄天之涯。

龐公攜家圖引爲張橘隱題。

鴻鵠巢高林。龜鼈穴深淵。所以龐德公。躬耕峴山田。當時劉表儕雄材。萬金足置燕王臺。臺成禽荒甘鳩毒。醉隼臂錦呼鷹來。鷹飢受呼飽則去。非熊之倫孰得馭。諸兒豚犬遺以危。況復蒼生天下慮。蘇嶺石鹿雙聳然。霞日絢爛芝莖鮮。囊衣裹棧車連連。白驃青犢參後先。舉家相攜入長煙。竟託採藥終天年。至今事跡有在心。無傳。嗚呼孔明不遇大耳主。亦必老向隆中眠。

虞美人行贈邵倅

大王氣蓋世。力拔山。七十餘戰龍蛇間。得人爲霸失人虜。有妾如花無死所。夜寒蒼蒼星月高。不惜傾身帳中舞。大王恩深淺。東海青血燐燐春草在。當時早化劍雙飛。四面楚歌那慷慨。芒碭天開五色雲。雌雄竟與雄鸞羣。嗚呼後世亂紛紛。非君擇臣臣亦當擇君。

唐馬引

明皇樂極天寶年。擊舟將求海上仙。一朝神遊跨八極。數十萬騎屯雲煙。赤文綠字不復見。錦幪黃帕爭來獻。衆中一匹目如電。膺門沫緒珠流汗。龍顏眷愛不肯騎。蕭蕭弄影華清池。奚官日給三品料。教駢攻駒隨所之。是時羊車行幸早。柳暗花柔忘卻曉。夢驚鼙鼓遂播遷。疑碧空涼遺宿草。顛危注意大將賢。有

馬如此無人前。至今悲風起毫素。漢路欲飲長城泉。書生亦自心嗒然。

危腦帽歌讀五代前蜀史有感而作

白兜羅青納襖。金鵝翠翎七寶飾。圓方反正無定式。國人戴之天下惜。後宮如花醉妝美。名王無心冠帶理。大木晝拔貪狼風。猶汎樓船濟江水。承平禮樂亦草草。豈但當時帽危腦。可憐來者忘喪元。紅纓末亂如雲擾。君不見玉帛萬國先王朝。會弁如星麗九霄。鳳皇麒麟在郊徠。雙龍前殿奏簫韶。

天門行

天門高高俯四極。寸田尺地登版籍。澤梁無禁漁者多。瀚海橫戈恣充斥。去年官饑私啟攘。今年私釀官價償。屠燒縣邑誠細事。大將不死鯨鯢鄉。謂李羅帖木兒左丞烹羊椎牛醉以酒腰纏白帶紅帕首定盟敵血許自新禦寇征蠻復何有。國家承平歲月久。念汝紛紛迫餬口。羽林堅銳莫汝撓。慎勿輕夸好身手。春風柳黃開陣雲。號令始見眞將軍。

銀瓶孃子辭有引

孃子宋岳鄂王女。聞王被收。負銀瓶投井死。祠今在浙西憲司之左。逢感其節孝。敬爲之辭。

碧梧月落烏號霜。寒泉幽凝金井牀。綺疏光流大星白。夢驚萬里長城亡。女郎報父收囹圄。匍匐將身贖無所。官家聖明如漢主。妾心愧死緹縈女。井臨交衢下通海。海枯衢壅遷井不改。銀瓶同沈意有在。萬歲千秋露神采。魂今歸來風冷然。思陵無樹容啼鵲。先王墓木西湖邊。

江浙平章三旦八第宅觀勅賜龍電劍引

有劍有劉龍電名。白水爲質。金爲精。虹光夜貫。斗牛氣。玉匣晝起。波濤聲。藏之九廟。社稷重。用之六合。風塵清。英宗皇帝加撫。惜八十一鱗。寒動色。灤陽冰泮。臥蜿蜒。海子雨來。翻霹靂。神物自從前代寶。國公親授。彤庭錫。瑞鶴膏。聲今幾年。淮汴襄漢。興妖祲。呂虔大刀。霜雪鏑。頓芒挫鋒。莫敢前。公身佩之下。幽燕獨當一面。東南天馬。蹄所過。春草歇。百里青。見孤炊煙。古來尅敵。與制勝。未有如公忠勇盛。主將無慚。李藥師。偏裨亦是花驚定。四郡九州。聯貢篚。千村萬落。歸亡命。劍當是時。成大勳。凱旋卻挂吳山雲。歌長奔騰。木石怪。酒酣激烈。貔虎羣。復欲扣關。斬佞臣。以謝父老。安生民。於乎此劍。實與國公出處相類也。不久踴躍變化。延平津。

任月山少監職貢圖引

好風東來快雨俱。夫須亭觀職貢圖。厥會高鼻深目胡。冠插翟尾服繡襦。革帶鞬鞬貂襜褕。左女執盞右執壺。手容恭如下大夫。會妻髻椎將湛盧。五采雜珮相綵紆。轉顧飛虎飛龍旗。饒耳者殿帕首驅。嬰絡相跌兩侏儒。一擎木難珊瑚株。一載玉琢狻猊鱣。神髮髻髻狀乳龜。復誰牽之鬚髮須。最後我弁飾寶珠。若將入朝謹進趨。禿奚跟蹤亦在途。錦脾聽帶汗血駒。尊貴卑賤各爾殊。經營意匠窮錙銖。唐稱二閭道元吳。今也少監稱京都。少監材抱豈盡史。禹蹟曾爲帝親理。河伯川后備任使。無支祈氏甘胥靡。大得延祐貞觀比。輦陸航海填筐篚。鳥言夷面遠能邇。少監臨古不無以。趙公商公暨高李。頡頏霄漢嗟已矣。雲雲

曙開儼斧辰，包茅不入賴誰泚。周編大書王會禮，安得臣臣奉天紀。陋儒作歌歌正始。

淮安忠武王箭歌題垂虹橋亭

淮王昔下江南城，萬竈兵擁雙霓旌。錦裘繡帽白玉帶，金戈鐵馬紅鞶纓。阜鵬羽箭三十六，一一插向鯨魚腹。鹿麕晝號猿抱木，王師所過全生育。彤弓親授聖天子，弓影射入東吳水。水波恍浸銅柱標，仰見浮屠半霄起。王當是時戡武功，指顧草樹生春風。宋家降璽朝暮得，思罷貫革垂無窮。浮屠上層龍所宮，寶盤紺碧蓮花同。弦張滿月報鵬發，忽露半筭薌雲中。鐃歌咽轟鼓笳競，父老頓足驢聲應。泗州使返睢陽亡，漢關將入天山定。兩賢成敗關衰盛，雄材逸氣王誰竝。我浮扁舟五湖興，載拜何由重安靖。猛士經過合深省。

僧蓮松檜圖歌書遂昌山人鄭明德序後

蓮公畫稱東吳精，草蔓花房未嘗寫。森張意象亭毒表，輒有神人助揮灑。常州貌得劍井松，劍氣騰溫相鬱蔥。膏流節離禍幸免，至今顏色青於銅。孔廟之檜尤硃硃，地爐所守龍所窟。欒柯落陰根走石，疑是忠臣舊埋骨。松兮檜兮豈偶然，陵霜轢雪兵燹年。箭痕刀痕盡駢裂，用命欲拄將崩天。王姚王安節憑城親被堅，身殲城破百代傳。無人上請配張許，日夜二物風雷纏。鄭君鄭君古君子，此文此畫良有以。我題短章非鬬靡，用弔忠魂附遺史。吁嗟烈士長已矣。

敬題楊山居太史所藏文皇帝御書奎章閣碑本後

先皇龍鳳姿，談笑夷內難。萬方賀清寧，人文劃昭煥。奎章崇延閣，天藻發宸翰。字畫擬庖犧，贊詠缺姬旦。璇霄麗日月，華露濯河漢。流腴蓬萊池，垂耀鵷鵠觀。今王廣舊制，碑本點無竄。璽封賜臣珥，豈是世所玩。爲爾忠義心，可與金石貫。蟲蛇深禹穴，蟬蛸飛簡汗。寶藏風塵外，永夜卿雲爛。相逢感頭白，展卷復三歎。游儻懷故淵，老驥戀餘棧。誰昔侍經筵，流連忘筆諫。

七里灘夜泊

山經富春來，百里紫翠接。嚴灘十八曲，曲曲屏數疊。兩厓負金鼇，一水流冰硤。直上石作臺，梯磴緣巖業。雲霏變昕夕，天地齊浩劫。緬懷巢許徒，遁此誠所愜。千秋釣游地，不屬漢臣妾。客星在沅寥，五緯光相汁。澄潭龍偃臥，影帶沙棠楫。風吹澗沚毛，露灑松桂葉。先民不可見，思從漢臯涉。夜久蜻蛚高，長歌振疲薶。

王貞白墓在信州永豐縣

道出縣西門，躡履可百步。巋然翠石表，有唐校書墓。校書吾宗人，天馬謝疊御。首登上昇名，晚獲鄉曲譽。至今坊改賢，當時官復賦。流傳折楊柳，婉婉春態度。載拜還汛掃，良非汾陽慕。龍貴德自潛，豹貴文不露。邱園望京洛，豺犬方反顧。竟抱孤臣憂，白日空復暮。樵童指梧楸，往往冠蓋駐。珠襦玉匣葬，麥飯曾不具。神飈薦林響，公意答知遇。惟南豐山高，靈溪浩東注。

馬洲望孤山

海門窺長江，鉅浸天浩淼。山根纒坤軸，百里見孤杪。風披陰霾盡，露灑石黛曉。龍來蒼林溼，鷗舞白浪杳。

居然蔽中洲。隱若壓外傲。幽貞水仙態。軒特國士表。時時降天人。旌旆光繚繞。予將展高步。兵氣秋見兆。嚴霜草不殺。悵望翠清悄。浮雲非無蒂。薄暮心曩曩。

揚子舟中望鵝鼻山時聞黔南消息

山環芙蓉城。私怪鵝鼻狀。奔濤鎮長薄。大石山名山凍相抗。勢雄千軍壘。氣傲萬鍾藏。草樹春不蕃。莓苔滑難傍。剛風過靈雨。復值桃花漲。破暝鷗鷺盤。乘陰龍魚王。飄鼓一葦閒。攪之膽增壯。謝安晉元臣。豈謁江海量。蒼生方顛連。其敢遂疎放。黔陽百粵地。黃霧吹虎鬚。再觀神秀姿。不止西北向。惇惇蒼精出。閃閃白月漾。三叫馮夷宮。吾奚獨悵悵。

奉題高宗答刑部侍郎衛膚敏詔後爲其七世孫仁近賦詔文附

勅膚敏。省所奏辭免尙書刑部侍郎恩命事。具悉。朕倉卒渡江。圖籍散亡。深慮吏緣爲奸。奏牘稽留。平讞失當。以卿平日正色侃侃。論議堅明。據誼守節。屢觸權貴。必能爲朕分別隱微。章明枉直。與其殺不辜。寧失不經。欽哉。汝諸毋廢朕命。所請宜不允。故茲詔示。想宜知悉。七日。

建炎龍渡江。中外極觀仰。赫焉志恢復。寢爾濫刑賞。公時命秋官。固辭表三上。夙忝絲綸日。春班朝元仗。乘輿今播遷。宗社亦震蕩。空言忤權貴。曷以錯諸枉。放棄樛櫟材。庶全雨露養。皇覽賜手詔。於昭日月朗。大禹舍臯陶。欽恤義誰廣。巍巍白雲司。濯濯金仙掌。元陰闕棘木。一旦風颯爽。有疏甚詆佛。無愧十八丈。余山儼遺墓。世世敦禮享。文光掩虹霞。精氣懾魍魎。卓落羣松冷。萎蕤叢蘭長。經過率下馬。謂有神還往。